

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Munir. A. Azim (atba)

15 Mai 2020

21 Ramadhan 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors:

Le Laila-tul-Qadr et I'tikaaf (Pt.2)

Pendant le mois sacré de Ramadhan, bane croyants recherche bane faveurs divines et zot rode tous l'occasion pou rapproche avec Allah (twa), à travers tous saki Allah fine metté comme *Farz* (obligatoire) et saki Li fine faire *Nafil* (volontaire) aussi. Récompense *Nafil* pendant Ramadhan vine couma ene *Farz*, et récompense *Farz* li beaucoup plisse ki sa encore.

En tant ki bane croyants, nous bizin toujours recherche saki de bon lors sa la terre là, et saki de bon dans *Aakhérat*. Nous faire sa *duah* là :

Rabbana atina fi d-dunya hassanatan w-wa fi-l-aakhirati hasanatan w-waqina 'adhaba n-naar. Ô nous Maître, accorde nous saki de bons lors sa la terre là, et saki de bons dans *Aakhérat*, et protége-nous contre punition difé! [Ameen].

Ene croyant li faire toujours sa *duah* là, kot li rode saki pou profite so lécorps physique lors sa la terre là, et aussi saki pou profite so l'âme, de côté spirituelle. Et kan ene jour li ena pou présenter devant Allah, li vine vers Allah avec ene l'âme pure. Sa *duah* là ena ene grand signification kan nous analyse li en profondeur.

Kan nous cherche saki de bons lors sa la terre là, nous pas rode bane bel bel zaffaire, mais saki pou bon pou nous. Ki pou bon pou nous ? Pas seulement le minimum ki nous bizin pou vivre avec nous les corps physique lors sa la terre là mais aussi kot nous plonge nous dans la spiritualité, kot nous faire saki Allah fine dire nous faire, et alors kan nous suivre bane directives d'Allah, alors nous retourne vers Allah avec ene l'âme pure, pareil couma Li ti créer nous pure.

Donc pendant le mois sacré de Ramadhan, bane croyants gagne l'occasion pou rapproche zot plisse avec Allah à travers garde *Roza* et accompli zot bane *Salaat* (Namaz/ la prière). Le jour commencer bonaire pour zot, parski zot bizin abandonne zot lili confortable à peu près deux heures avant bane premiers lueurs de l'aube.

[Zot pas dormi, couma dans certains pays, ziska fort tard. Ena dimounes penser ki garde *Roza* veut dire manger ziska bien tard dans la nuit, faire ene festin, couma dire zot fine fini fer zot *Sehri* et zot alle dormi, ene sel dormi, et même pas faire Namaz et zot lever tard – zot croire ki garde *Roza* pendant Ramadhan, c'est coumsa ki zot bizin faire li, mais en vrai dire zot pas fine comprend philosophie de Ramadhan !]

Après ki zot (bane croyants) fine fer zot *Salaat* (prières) de Tahajjud, zot prend zot repas (*Sahur/ Sehri*) et ensuite zot alle fer zot *Salaat-ul-Fajr* dans Masjid. Mais en sa bane jours de confinement là dans la plupart de bane pays du monde, la caze de bane croyants fine transformé en Masjid, kot le chef de la maison – papa là ou so garçon – ki prend les devants pour dirige bane *Salaat* (Namaz) et pour transforme zot la caze en entier dans la paix. Zot faire sa *duah* là :

Rabbana hab lana min azwaajina wa dhurriyyatina qurrata a'yunin-waj'alna li-l-muttaqina imaama. Ô nous Rab, faire ki nous bane épouses et nous zenfants vine ene fraîcheur pour nous lizié ! Et faire nous vine bane Imams (Chefs) de bane Muttaqi (pieux) ! [Ameen].

Après *Salaat*, bane croyants ensuite récite dans ene zoli la voix le Quran Shareef, dans ene telle façon ki sa touche les cœurs – zot propre les cœurs et les cœurs de bane les autres aussi. Nous bien-aimé prophète (saws) ti pé redoubler la récitation du Quran Shareef pendant mois Ramadhan. Ange Gabriel, couma nous dire, Hazrat Jibreel (as) ti pé déssane pou fer li récite le Quran. (Bukhari).

Le Saint Prophète (saws) fine dire: « *Carême [Roza] et Quran pou intercède pour ene serviteur le jour de la résurrection. Roza pou dire: 'Ô Rab! Mo fine empêche li boire et*

manger pendant lizour. Alors laisse-moi intercéder pou li.’ Quran pou dire : ‘Ô Rab! Mo fine empêche li dormi la nuite. Alors laisse-moi intercéder pou li.’ Alors, tous les deux pou intercéder pou li. » (Ahmad, Nasaï)

Pendant lizour, bane croyants bizin poursuivre zot bane occupation quotidien mais zot les cœurs bizin reste attaché à Allah, pli solidement ki avant, zot bizin reste attaché aussi avec *Zikr* et récitation Quran Shareef surtout pendant bane derniers dix jours de Ramadhan, en espérant recevoir bane bénédictions exceptionnelles d’Allah pendant la Nuit du Destin (*Laila-tul-Qadr*).

Kan nous tende *Azaan* pou *Salaat-ul-Maghrib*, nous conner ki soleil fini coucher et nous bizin alle faire nous Namaz (Namaz Maghrib c’est ene Namaz ki nous accomplir zis après le coucher du soleil). Tous bane ki fine garde *Roza* recommence manger et boire; zot les cœurs rempli de reconnaissances envers Allah, Qui de par de So grâce et So miséricorde fine donne zot l’occasion pou garde *Roza* d’après So volonté.

Après *Salaat Esha* (dernier Namaz ki nous faire à soir), nous faire huit *Rakaat Tarawih* et ensuite nous faire nous trois *Rakaat* de *Witr*. Si zot sûre ki zot pou faire Tahajjud bonaire avant *Sehri*, alors zot capave pas faire *Witr* après huit *Rakaat Tarawih* et zot faire et complète zot Namaz Tahajjud et clôture li avec *Witr*.

Le Saint Prophète (saws) fine dire: « *Celui ki lever pou prier pendant bane la nuits de Ramadhan avec la foi et en comptant la récompense divine, Allah pou pardonne so bane fautes passées.* » (Bukhari, Muslim).

Pendant Ramadhan, li recommandée pou faire bane bons actions (la charité en particulier). Nous bien-aimé prophète (saws) fine dire: « *Meilleur charité c’est celui ki accompli pendant Ramadhan.* » (Tirmidhi).

En plus de sa, li (saws) fine dire : « *Celui ki donne manger ou boire à quelqu’un ki pé garde Roza d’ene dubien ki fine acquis d’ene façon licite [Halal], bane anges pou continuer prier pou li pendant Ramadhan. Ange Jibreel (as) pou prier pou li la Nuit du Destin.* » (Bukhari).

Kan bane derniers dix la nuits Ramadhan vini, celui ki faire l’intention pour reste *l’tikaaf*, li retire li dans Masjid pour concentrer li plisse dans so l’adoration d’Allah. Dans sa bane période de confinement là, alors ki bane croyants pas capave alle Masjid, excepter bien sûr si Masjid li près de nous, alors celui ki faire so l’intention

pour *l'tikaaf* li prépare li pou alle en retraite kan arrive 20^{ème} la nuit Ramadhan, ou même plus tôt si li envie.

Le but de *l'tikaaf*, c'est pou dépense so lé temps complètement dans bane *Ibaadat* – dans Namaz et bane les actes d'adorations, sois dans ene Masjid (kot ena la prière en congrégation ki faire régulièrement) ou dans ene la caze kot Namaz en congrégation li possible, avec la seule intention pou concentrer li dans Namaz et pou contempler Allah [dans le *Zikr-i-Ilaahi*] et kot alors li bizin oublier tout bane relation avec sa le monde ici-bas là. Li dédie li dans le *Zikr* [rappel] d'Allah. Li passe tout so les temps pou glorifier Allah et alors Allah ouvert pour li bane la portes de So bane trésors spirituels, et alors ena ene manifestation de bane la lumières ki commencer, bane telle la lumières ki bane dimounes de sa le monde là pas capave même concevoir. Si sa retraite là observée avec tout le sérieux ki bizin, alors li capave vine le meilleur de bane actes de dévotion.

D'après Hazrat Aisha (ra), ene dimoune ki observe *l'tikaaf* faudé pas visite bane malades, participe dans ene *Janaza* ou alle visite so missié [si sa dimoune ki pé reste *l'tikaaf* là ene madame] ou so madame [si sa dimoune ki pé reste *l'tikaaf* là ene missié]. Sa dimoune là pas sorti excepter pou li alle faire so bane besoins naturels ou pou alle dans Masjid ou lieu de prière.

Kan mo ti dans Jamaat Ahmadiyya, si arriver Jummah ti pé faire dans ene lotte place ; par exemple, longtemps ti pé faire Jummah dans Masjid central et alors bane ki ti pé reste *l'tikaaf* dans bane ti Masjids ti bizin déplacer, kot ene transport li mis à zot dispositions pou zot alle fer Jummah et pou retourne zot dans zot lieu de *l'tikaaf* aussitôt ki Jummah fini. Moi, personnellement mo pas trouve sa correcte et li pas d'après sa Hadith là. Mo ti même proposer ki au lieu fer sa bane dimounes là bouger pou Jummah, bé ki faire pas faire ene dimoune vine dans sa bane Masjids là pou faire Jummah avec zot, ou sois donne ene d'entre zot-même pou faire Jummah parmi tous bane ki pé faire *l'tikaaf* dans Masjid ? Parski li pas ena pou prépare Khutba ; sa Khutba là li ene même Khutba ki fer partout, dans tous bane branches. Sa c'est ene l'exemple ki mo pé donne zot.

De plus bizin conne observe le *l'tikaaf*. Bien souvent, moi-même mo ti observer ki ena bane dimounes ki zot pé garde *l'tikaaf*, mais selman zot pé fer lotte dimounes asté cigarettes pou zot, et couma fini casse *Roza*, zot alle lors balcon, zot alle fumer. Ti ena ene camarade ki ti tellement attacher avec fumer, ki kan li fini prend so *Sehri*, et avant *Azaan* pou Namaz Fajr, vite vite li alle fume ene cigarette, et tantôt après

Iftaar, li ré-alle fumer. Alors, tout sa c'est pas vrai l'esprit de *l'tikaaf* et de *Roza* en générale.

Sa dimoune ki observe le *l'tikaaf* là – si li conne observe li couma bizin – so bane gains spirituels zot au-delà de tous bane description. Li gagne Allah même comme so récompense. D'après ene Hadith: Celui ki approche d'ene coudée avec Allah, Allah pou approche de deux coudées avec li. Allah dire [dans ene *Hadith-e-Qudsi* – rapporté de la bouche du prophète (saws)]: « *Si li [Mo serviteur] vine vers Moi en marchant, Mo galouper vers li.* » (Bukhari, Muslim)

Pour savoure le plaisir de la proximité d'Allah, ene croyant li transforme li alors en ene image de dévotion complète.

Hazrat Aisha (ra) rapporter ki le Saint Prophète (saws) ti pé faire *l'tikaaf* pendant bane dix derniers jours de Ramadhan et li fine contigner sa pratique là jusqu'à so la mort. Après so la mort, so bane madames fine suivre sa *Sunnah* (pratique) là. En résumé, sa mois là renferme bane multiples bienfaits et récompenses. Et pour bane ki retire zot [alle en retraite] pour l'adoration d'Allah [kot zot garde zot *l'tikaaf* couma bizin], ena ene cadeau ki zot recevoir: c'est le cadeau ki connu comme « *Lailatul Qadr* ».

Lailatul Qadr c'est sa la nuit glorieux kot le Quran Shareef ti révélé pour la première fois. Allah fine révèle ene *Surah* [Chapitre] exclusif lors la Nuit du Destin [*Lailatul Qadr*]. Allah dire :

بِسْمِ اللَّهِ الرَّحْمَنِ الرَّحِيمِ ۞ إِنَّا أَنْزَلْنَاهُ فِي لَيْلَةِ الْقَدْرِ ۞ وَمَا أَدْرَاكَ مَا لَيْلَةُ الْقَدْرِ ۞ لَيْلَةُ الْقَدْرِ خَيْرٌ

مِنْ أَلْفِ شَهْرٍ ۞ تَنْزِيلُ الْمَلَكِ وَالرُّوحُ فِيهَا بِإِذْنِ رَبِّهِمْ مِنْ كُلِّ أَمْرٍ ۞ سَلَامٌ هِيَ حَتَّىٰ مَطْلَعِ الْفَجْرِ ۞

Bismillaahir-Rahmaanir-Rahiim; 'Innaaa 'anzalnaahu fii lay-latil-Qadr: Wa maaa 'adraakamaa Laylatul-Qadr? Laylatul-Qadri khayrum-min 'alfi shahr. Tanazzalul-malaaa 'ikatu war-Ruuhu fiihaa bi-'izni-Rabbihim-min kulli 'amr: Salaamun Hiya hattaa matla-'il-Fajr.

« *Au nom d'Allah, le Très Gracieux, le Très Miséricordieux. Vraiment, Nous fine fer (le Quran) déssane pendant la Nuit du Destin. Et ki pou faire toi conner ki été sa la Nuit du Destin? La Nuit du Destin li meilleure ki mille mois. Bane anges et l'Esprit déssane pendant sa la nuit là, par permission zot Maître, avec tout bane l'ordre. C'est la paix, ziska ki soleil levé.* » (Al-Qadr 97: 1-6)

Tellement sa Surah là so signification li vaste, mais en bref mo pou commente seulement lors so dernier partie, parski si nous réfléchi bien lors sa bane versets là, Allah pé faire comprend ki Li pou envoye le *Ruh'il Quddous* lors So serviteur choisi, et sa en li-même li ene *Lailatul Qadr*, kot ou gagne ene la paix divine ki déssane du ciel. Sa l'atmosphère là en li-même li extraordinaire, pareil couma pour la venue d'ene Messenger d'Allah. Kan ou gagne sa *Lailatul Qadr* là, abé, penser ki ou ene dimoune bien chanceux ki fine réussi reconnaitre et accepter sa Messenger là et pou contribuer pou amène la paix, kot ou même tout d'abord ou en paix. Pas ena kit jalousie pour bane les autres dimoune, pas ena l'avarice, la gourmandise pour bane dibiens de sa le monde là. Là-même ena ene préparation kot ou bizin transforme ou la vie et profite pleinement de sa bane bénédictions là, et faire en sorte ki sa bénédictions là reste avec ou tout au long de ou la vie.

La Nuit du Destin, sa c'est ene grand destin même sa, kot dans l'obscurité Allah envoye So Messenger, kot li vini, et li déssane avec ene lumière. Pareil couma soleil casse l'obscurité, pareillement, sa Messenger là kan li vini, li casse sa l'obscurité là et li donne ene la lumière, et li faire tous bane chercheurs de vérités et bane *Momin* (croyants) vivre en paix.

Donc, le **Lailatul Qadr** ena ene signification bien vaste. Le plus acceptable c'est ki durant le mois de Ramadhan, spécialement pendant bane dix derniers la nuits, ena ene la nuit là-dans kot tous bane *duahs* [ki valable bien sûre] zot accepté. D'après bane paroles du Saint Prophète (saws), nous bizin cherche le *Lailatul Qadr* pendant bane la nuits non-paires de bane jours de Ramadhan. Couma mo fine dire zot la semaine dernière, fine aussi rapporté ki le prophète d'Allah (saws) fine dire ki bizin cherche le *Lailatul Qadr* durant les 21, 23, 25, 27, et 29 de Ramadhan. Cherche li plisse pendant 25^{ème}, 27^{ème} et 29^{ème} la nuit.

Bref, c'est ene la nuit remplie de bénédiction. Sa dimoune ki expérimente *Lailatul Qadr* li considéré comme ene dimoune bien chanceux. Péna mots pour décrire sa opportunité là, sa grand chance là.

Allah (swt) fine faire déssane Surah Al-Qadr en mettant en valeur sa la nuit béni là kot Li fine faire comprend ki si bane suivants de Hazrat Muhammad (saws) faire *Ibaadat* durant sa la nuit sacré là, zot *Ibaadat* pou meilleur ki mille mois de *Ibaadat*. Sa en effet li ene cadeau extraordinaire de la bonté d'Allah!

Hazrat Anas bin Malik (ra) rapporter ki le Saint Prophète (saws) fine dire à l'approche de Ramadhan : « *En vérité, ene grand mois pé annoncé pli divant ; ene mois dans quoi ena ene la nuit meilleur ki mille mois. Celui ki pas fine conne profite de sa la nuit béni là pou perdi tous so bane bienfaits [bénéfices].* » (Ibn Majah, Mishkat)

La Nuit de *Qadr* li le plus supérieur et chef de tous bane les nuits et sa nous capave comprend li, entre autres, de deux façons:

- 1) *Qadr* veut dire destin et couma nous réciter dans dernier *Kalima*, nous croire dans le destin.
- 2) *Qadr* veut dire aussi puissance. Couma Allah dire nous à plusieurs reprises dans Quran Shareef: ***Wallaahu ala kulli shay-'in Qadiir***: Allah Li puissant lors tout kitchose.

L'*Ummah* du Saint Prophète (saws) fine sitant honoré par l'attribution de sa grand la nuit là parski non seulement zot capave récolter plisse ki mille mois *Ibaadat* dans ene seule la nuit, mais aussi aucaine peuple ou suivants de bane les autres prophètes ti gagne ene telle la nuit pareil.

Par So sagesse, Allah (swt) pas fine dévoile nous ouvertement sa la nuit là mais Li fine zis précise nous ki sa la nuit béni là li caché dans dix derniers la nuit du mois béni de Ramadhan, de façon à séki bane musulmans faire bane zefforts pour cherche li. De sa manière là, zot pou faire beaucoup zefforts dans *Ibaadat* dans dernier partie de Ramadhan.

Rappel zot, Ramadhan c'est ene mois de patience. Dans Surah Al-Imran, dernier verset, verset 201, kot Allah dire : « **Ô ou ki ena la foi, montrer patience, supporter avec patience, tini ferme et suive chemin Allah afin ki ou prospérer.** »

Ou trouver couma Allah pé adresse bane croyants, bane dimounes ki ena *Imaan* (la foi) et dans sa mois de Ramadhan là, c'est ene mois de patience kot tout kitchoses ou bizin supporter avec patience, même si kikaine pé la guerre avec ou, même si kikaine pé zoure ou et même dans ki façon, ou bizin supporter : Ou la faim, ou boire, tout ou bizin prend patience parski résultat de sa, couma mo fine dire zot, c'est ou gagne Allah comme ou récompense. Parski Allah fine mentionne ene boute là-dans : « **... et suive chemin Allah afin ki ou prospérer.** »

Alors, si ene dimoune suive bane commandements d'Allah, li suive Allah So bane l'instructions et dans sa mois de Ramadhan là, ou trouver même ki kantité bénéfice

ou gagner là-dans, ki kantité récompense ine garder pour bane dimounes ki ena *Imaan* (la foi) et pou *Roza*, c'est Allah ki donne so récompense. C'est pas l'homme. Kan ene dimoune li garde *Roza*, li pas garde sa pour l'homme li. Et Allah fine dire ki *Rozédaar* so récompense [en suivant tous bane commandements ki Allah fine metté et tous bane commandements ki attacher avec le *Roza*, alors] c'est ki li gagne Allah même comme so récompense. Alors c'est Allah ki donne récompense, Li élève celui ki Li oulé, Li récompense celui ki Li oulé. Nous l'homme nous pé faire zéffort. Personne péna sa pouvoir ni sa capacité, ni [sa droit là] pou dire : « *Voilà, sa mois Ramadhan là, mo pou gagne tant-tant récompenses. Mo fine fini gagne Jannat.* » C'est zis Allah ki conné ki sanlà so Ramadhan accepter.

Donc, azordi jour nous pé trouve dimoune pé juge la foi de zot camarade. Zot pé juge la foi de bane les autres. Mo pas conné kot zot fine gagne ene patente pou juge la foi de bane les autres. Kan Nabi Kareem Hazrat Muhammad (saws) li-même, li pas fine gagner même, Allah même pas fine donne li sa patente pou juge la foi bane dimounes. Li (Allah) fine dire li (saws) passe so message et c'est Allah ki donne *Hidaayat*. C'est Allah ki donne *Imaan*, Allah ki pardonner ; Allah Li élève celui ki Li oulé, Li pardonne celui ki Li oulé et Li puni celui ki Li oulé.

Couma Allah fine dire dans Quran Shareef : « **Eski to fine considère cas bane dimounes ki dire zot-mêmes pure ?** [*Eski to fine considère zot cas, ki zot-même zot pé présente zot ki zot-même pure ?*] **Mais c'est Allah ki rende pure bane ki Li oulé. Et Li pas faire personne le plus petit injustice.** » (An-Nisa 4: 50)

Sa verset là pé démontrer, pé faire ressortir ki c'est Allah ki rende pure celui ki Li oulé. Mais ena dimounes ki pé tappe l'estoma, zot pé considère zot-mêmes zot bane dimounes pli pieux et pli pure. Et zot ena le toupet et l'audace pou apporte ene jugement (*fatwa*) pou dire ki zot Khalifa fine ena pitié pou ene dimoune ki [sois-disant] pé créer *fitna*. Moi mo demande sa Mullah dans Tamil Nadu là, en passant, ki li fine adresse mo bane disciples et lors Whats App pé circuler, vine décrire, vine de l'avant pou dire ki *fitna* et décrire sa, ki *fitna* ki fine créer ? Et li dire ti bizin donne moi « *death penalty* ». Alors, tanne sa parole ene coup ! « **Death penalty** ». Li même li pas conné ki fine arriver, lors ki kalité rapport li fine baze li, li cause « *death penalty* ». Bé moi mo ti pou dire sa Mullah là, abé li-même et so Khalifa et Jamaat Ahmadiyya, alors commence mette prison dans tous bane headquarters ou sois dans bane Masjids Ahmadi ; pareil couma zordi zot pé mette bane bel-bel pano dans la cour Masjids, pé mette bane gros gros photo – kot sa pé montrer, abé kot '*Laa-Ilaaha Illallah*' fine aller ?

Donc, li pas sujet de mo Khutba azordi mais mo pé faire zot comprend, ene Mullah couma li fine agir. Li fine vine pli pire créature sous le toit du ciel pareil couma Hazrat Muhammad (saws) fine dire dans Mishkat ki pou arrive ene l'époque pou vini ki pou ena bane bien-bien zoli Masjids, mais pas pou ena bane *Mussalli* (adorateurs) ki pou ena *Taqwa* (la crainte d'Allah), ki pou ena *Imaan* (la foi). Sa bane *Ulémas*, bane *Mullahs* là pou bane pli pires créatures sous le toit du ciel.

Sa montrer ou ki kalité la haine zot ena kan Allah envoie So serviteur. Donc, bé commence mette prisons, commence mette la corde pendi. Kan ene dimoune pé dire ene zaffaire, li pé cite versets Quran, li pé cite saki Nabi Kareem Hazrat Muhammad (saws) fine dire, li pé dire ki c'est Allah ki fine donne li la révélation, ou sois li pas pé d'accord avec bane zaffaires ki Jamaat – bane Managing Committee [*Amila*] ou n'importe ki sanlà – pé faire [même si le Khalifa pé alle à l'encontre du Quran et Hadiths] et li pé faire zot comprend ki saki zot pé faire pas correcte, alors pou zot [zot pé dire], sa dimoune là pé créer *fitna*. Alors [d'après zot] bizin donne « *death penalty* ».

Abé commence mette prison, mette la corde pendi dans tous bane headquarters du Jamaat ou Masjids Ahmadi. Kan n'importe ki dimoune faire « *erreur* » [d'après zot conception de erreur] dans Jamaat, abé donne zot « *death penalty* ». Parski kan bane les autres pé donne « *death penalty* », abé zot ena raison alors saki zot ti pé faire ?! [*Wa Nawzubillah min Zaalik*].

Donc, mo dire sa Mullah là, réfléchi lors saki li pé faire et pense bien sa causer ki li fine causer dans ene mois de Ramadhan. Pense bien et réfléchi, et li décrire sa *fitna* là et mo challenge li, li vine de l'avant, li vini li décrire sa. *Insha-Allah*.

Maintenant mo cause concernant **ZAKAAT, FITRA** et **FIDYA**. Mo fine gagne questions lors là, et mo pé réponde li dans sa Khutba Jummah là.

D'après la loi Islamique (*Shariah*), *Zakaat* li l'aumône obligatoire (*Farz*) lors tous bane dimounes, bane croyants musulmans ki ena les moyens, et sa au moins zot bizin tire li ene fois par an. Li faire partie de bane cinq piliers de l'Islam. Si quelqu'un refuse accepter so caractère obligatoire, il vine infidèle (*Kafir*). Et celui ki pas acquitte li de *Zakaat* correctement vine ene grand pécheur (*gunehgaar*).

Zakaat li tellement important ki le premier calife de l'islam, Hazrat Abu Bakr Siddiq (ra) durant so Khilafat ti déclare infidèles tous bane ki pas accepter pou paye *Zakaat*, et li ti pé même déclare zot la guerre pour sa.

Hazrat Muhammad (saws) fine dire: « *Mo fine gagne l'ordre pou combatte bane dimounes ziska ki zot reconnaite ki pas ena aucaine les autres divinités aparte Allah, ki zot accompli la prière et paye Zakaat. Si zot faire sa, zot préserve de moi zot être et zot du biens, sous réserve de la loi de l'islam. Zot comptes définitifs appartenir à Allah.* » (Bukhari, Muslim).

Allah dire dans Quran Shareef concernant *Zakaat* : « **Prélève de zot dibiens ene aumône par quoi to purifier et béni zot, et prier pour zot. To la prière li ene tranquillité pour zot. Et Allah Li tende tout et Li trouve tout.** » (At-Tauba 9 : 103)

Zakaat fine implémenter dans l'islam pour combattre la pauvreté et pou élimine li. Dans sa sens ki, si bane riches et bane ki pli fortuné donne correctement ene partie de zot richesse et fortune tous les l'années à bane pauvres, alors sa bane là pou trouve ene ré-haussement de zot niveau de vie. Ainsi la richesse de bane dimounes pou équilibré dans bane divers tranches de la population.

Le principe c'est pou offert sak l'année ene quarantième d'ene dimoune so fortune c'est-à-dire, 2.5% tous les ans. Le régime de l'islam pas prévoir la misère dans la société grâce à *Zakaat*.

Avant terminer, mo ti à content dire quelques mots lors *Sadaqa-e-Fitr (Fitra)*. Sa aumône ki nous appelle *Sadaqa-e-Fitr* ou couma nous tous conné comme *Fitra* li ene *Sadaqa* ki Allah (swt) fine rende obligatoire. Li ena pour but pou nettoye [purifier] nous bane *Roza* (jeûnes). Et nous bizin garde à l'esprit ki nous bizin acquitte li avant Namaz *Eid-ul-Fitr*. Kan nous ti en état de jeûne pendant Ramadhan, le fait pour donne le *Fitra* c'est pour assurer ki Allah accepter nous bane *Roza* et purifier sa grand *Ibaadat* ki nous fine faire là. Li obligatoire pour tous bane parents pou zot donne *Fitra* pour zot bane zenfants ki encore sous zot responsabilité et sa, même pour ene bébé ki fine fek prend naissance.

Et alors, ki li pou *Zakaat*, ki li pour le *Fitra* et même *Fidya* aussi, bane officiers du Jamaat [dans sak pays] bizin ramasse tous sa bane l'argent là, et kan li forme ene somme globale [kan zot tous fini contribuer], alors, bane responsables capave guetter ki bane dimounes dans bane situations bien difficiles et ki mérite sa bane

l'argent là. Mo conner ki la situation actuelle li bien difficile avec sa Lockdown ki nous pé vivre là. Sak croyant conner ki bane la peines zot pé traverser, mais Allah fine rende obligatoire sa bane contributions là, et après ki zot fini fer sacrifices couma Allah fine dire zot, alors bane responsables de bane Masjids ou du Jamaat prend en charge pou répartir [partage de façon équitable] sa bane l'argent et biens là à bane pauvres et bane ki dans le grand besoin.

Concernant le *Fidya*, bane personnes malades âgées, bane mamans ki enceinte ou ki pé allaite zot zenfants et ki pas pé capave garde *Roza*, et bane voyageurs, couma Allah (swt) faire nous comprend dans le Quran Shareef (Al-Baqara 2: 185), zot bizin tire ou paye le *Fidya* sous forme de somme d'argent ki zot donne à bane pauvres, et ki corresponne à sa quantité de nourriture ki zot habituer manger tous les jours.

En terminant, nous bizin faire zeffort autant ki possible pou reste loin de la colère d'Allah et pou faire li nous devoir pou reste loin de bane péchés et pou empêche les autres aussi pou commette bane péchés.

Ki Allah accepter nous bane *Roza*, et tous nous bane sacrifices dans So chemin et accorde nous tous dans le Jamaat Ul Sahih Al Islam, et tous bane croyants musulmans sincères de par le monde bane bénédictions immenses de *Lailatul Qadr*. Ki Allah facilite zot chemins vers Li, et ki zot gagne So grâce et So Miséricorde de bane façons exceptionnel. *Amîne*.